

# Fasnacht 2011



## Sujet: iFASNACHT

Dr viel gnennti Buechstabe **i**, uf änglisch gseit „ei“, isch allne bekannt. Überall körsch es: **i**Pad, **i**Phone, **i**Pod, **i**Mac oder so, es isch allerhand. D'Escargots-Fratze mache bim Trend jetzt mit, dass me uns versteht. Mir könnte au anderi Wörter mit dem „i“ verbinde ihr gsehnt, das goht.

iSitzig het's brucht zum sage, was me an dr Fasnacht könnt bringe.  
iObe und ibitzeli mehr als nur iAbstimmig zum iSujet z'bestimme.  
Baut hän mir denn iWaage und das wo ihn zieht isch iTraktor.  
E super Sach das „i“ mir sin voll modärn, das isch im Fall wohr.

Jede vo uns isch iWaggis, het iKostüm a und iLarve uf em Kopf.  
iPlatz zum d'Sache de Lüt verteile, iDäfel für jede kleine Knopf.  
iErwachsene kunt au nit z'kurz: iBlueme oder iOrange kasch beko.  
Es isch ifach genial und iHit, dass mir das „i“ jetzt au hän übernoh.

Mir schmeisse iRäppli oder e paar mehr vom Fasnachts-Waage,  
iSpruch und iSpass dien mir mache, das muesch halt ertraage.  
Mir wänn ifach mit euch allne unsere Plausch, isch doch logisch.  
D'Hauptsach, isch doch klar, dass me iFasnacht lang drbi isch.

Sache z'beko isch sicher iGrund, dass du an dr Fasnacht bisch.  
iStund oder no inigi mehr an dr Strooss stohsch und alles gisch.  
Das isch nit iGramm normal, kasch uns verzelle was de wotsch,  
wenn ine nach em andere uf em Waage für gratis Sache frogsch.

iNormale vo uns muesch aber au nit erwarte, do kasch sicher si.  
Au mir hän mehr als iEgge ab, sunscht wäre mir hüt do nit derbi.  
Wär schribt sunscht iZettel mit so viele „i“ in fascht jedem Wort?  
Unseri Fasnacht do isch halt spezieller, findsch niene iandere Ort.

iFasnacht unser Sujet für's 2011, das hesch du sicher au kapiert.  
iFasnacht imol anders als anderi Joor, s'het uns richtig inspiriert.  
iFasnacht vo dem Buechstabe „i“ gleitet, igitlich ganz banal.  
iFasnacht im Trend mit dr neuschte Technik, hüt völlig normal.

Egal ob iPfiffer, iTambour, iSchnitzelbangg, iGugge oder iWaage.  
iFasnacht isch für alli doch s'Beschte, das muesch me do emol sage!



**E schöni Fasnacht 2011!**

[www.escargots-fratze.ch](http://www.escargots-fratze.ch)

